

Thilpiak a

BARNABAS LEH ANANIA-TE NUPA KIBATLOUHNA

By Jamson

Thilpiak i piak chiang a apiak a i piak khit nakleh hun mai ahia diam? Bang ziak a pia i hia chihte'n poimohna a neikha diam? Thilpiak i piak chiang in i piakna ziak (motivation) pen inleng poimohna a neikha diam? Hiai a thilpiak piak ahih chiang a ei leh ei kidot tuak hi a ka ngaihtuah bangzah hiam kon taklakte ngaituahna pethak in hiai thu thoh kisai in Laisiangthou in bang chi'n honna sinsak hiam chihte tamlou ngaihsut in nei lehng ka chi ahi.

Saptuam masate hunlai a thilpiak toh kisai a tamzaw I muhte Saptuam sung a unau tamsamte panpihna toh kisai ahi uhi. *"Huan misiangthoute a dia thahlawm thu zaw, Galatia gam a saptuam pawlte kiang a thu ka piak bang in nou leng na hih sam un. Ni sagih ni masapen in michih in vualzawna na muh bangzel un koih khawl chiat unla; ka hong chiang a thahlawm lakkhawm himhim a om louhna diing in"* (1 Kor. 16:1-2; cf. 2 Kor. 8:16-24).

"Tuin bel, misiangthoute nasem diing in Jerusalem khua ah ka hoh tadih diing hi. Masidonia leh Akhaia gam a mite'n kipaktak in Jerusalem khua a misiangthoute lak a gentheite a din thilpiakte a pe chiat uhi. Hiai thilpiak in amau nakpi'n kipaksak hi; amau diing in leng bat ahih him hi. Jentelte'n Judate khalam vualzawlina a kikhopih ua leh, salam thil a amaute taksap awng a huksak sam uh a kilawm him ahi" (Romte 15:25-27).

Huai hunlai mah in thu a ana semgim thugentu (preachers) leh upate (elders) panpihna diing inleng thilpiak ana pia uh ahihdan muh theih in omnawn hi (1 Cor. 9:1-14; 1 Tim. 5:17-18; Phil. 4:14-19. Hiai bible munte sim in). Hiai bang a thilpiak toh kisai a etton diing I muh theih masak pawl tuh Nasepte 4:32-5:11 thu ahi. Hiai Nasepte bung 4 leh bung 5na ah thilpiak petute lak a kilamdanna thupitak om ahihdan muh theih in a om.

Bung 4na ah, Saptuam masate **"a lak ua khat in leng a thil neihte, kei a tuam ahi"** chilou diing khop in **"lungsim mun khat leh ngaihtuah munkhat"** in a om uhi (Nasepte 4:32). Hiai a unau masate'n **a thil neihte uh leh amau kia** awlmoh in a neikei uh. Huai naksang in **unaute lak a tasam leh panpih ngaite** awlmoh in a nei uhi (Nasepte 4:34-35). Huaiziak in **a thil neihte uh a zuak ua unaute lak a hawm diing in Sawltak pite khebul ah ahon tawikhawm uhi.**

Barnabas leng unau tasamte lak a hawm diing a agam neih zuak in unaute lak a khat ahi. Mite phatlohna

diing leh amah leh amah kitawisanna diing a apiak ahikei. Hiai bang a na thupitak sem a thilpiak thupitak pesaktu tuh **unaute taksapna ngaihhokna leh thilpiak a kipahna (the joy of giving) a muhchet ziak** hipen hi'n a muh theih hi.

Bung 5na ah, Anania leh Saphira in leng huailai a unaute thilpiakdan mu in a thil neih uh zuak in, a sumte Sawltak pite khebul ah ahon tawi sam uhi. Himahleh hiai Anania leh Saphiratete'n thilpiak ahon tawin ziak uh atuam hi. **A piakna ziak uh a dangte atoh akibang kei.** A thutun (context) apan in Ananiate' thilpiak piak ziak tuh unau tamsamte awlmoh a neih masak ziak hilou a midangte piak ziak leh midangte phat loh diing lunggulhna ziak hizaw in a muh theih hi.

Jesu hinkhua ah leng, thilpiak piakdan toh kisai chi nih muh theih diing a om hi. Mark bung 12 ah, Jesu'n, Tempul a thilpiak pia diing a mihausa hong pai leh meithai muza nih pia diing a hong pai limtak in ana en hi (Mark 12:41-44). [Hiai apan inleng Jesu thilpiak leh I piakdan a lunglut ahihdan a muh theih hi]. Hiai a mihausa leh methai thilpiak kibat louhna muh theih a om tuh a piak zah uh (the amount) ahikei. **Hiai tegel thilpiak a kilamdanna lianpi piangsaktu tuh a lungtang (heart), a tup (focus) leh a hanthawntu (motivation) uh ahi.**

Tangtung a thugenna ah Jesu'n Anania leh Saphira bang a **"Mite muh diing a piakna"** a mohpaih hi Matthai 6:1). I thilpiakte ei leh ei kipahtawina diing leh mite muh diing tanlel khualna ahihlouh a, **'I Pa van a om hon mupa'** ziak a I piak ahih gige diing ahi (Matthai 6:1-4).

Thil na piak chiang a bang ziak a pia na hia? Laisiangthou hon hon sinsak bang a thilhoih hih theihna diing hun lemtang piak a na om chiang in (Galatiate 6:10) **'nang a diing a pia na hi hia ahihkei leh na panpih pen a diing a pia?'** Chih ngaihsun gige in. Hiai in vanlam ah kilamdanna lianpi anei hi.

PLACE OF WORSHIP

Yusuf Sadan, Secred Heart
Cathedral, Ashoka Road,
Delhi - 110001

Phone No. 9953968807
website : www.cocdelhi.org

**'KHRIS' SUANGPHUM, A WEEKLY BULLETIN FOR
THE MEMBERS OF THE CHURCH OF CHRIST, DELHI,
ON THE FIRST DAY OF THE WEEK'**

Enkaitu : Jamson Guite

BIBLE CLASS

Class

Adult : James, Siamkhanmuan
Inter. : Biakmang & Jamson
Junior : Minlun & Suanlian
Primary : Vungngaihkim & Rose
Beginner : Chingkhanlun & Rosely

Teacher

**TOUPA NI'
THILPIAK**

Date 24.9.2023 = 56,760-

LAI SIANGTHOU TANGTEL

**"Huan siangna bel dangka a diing ahi, huan meipi
dangka-eng a diing: himahelh Toupa'n lungtangte a
endik hi" - Paunakte 17:3**

THU TUAMTUAM

THU TUAMTUAM

BIAKNA HUNZEEK

TOUPA' NI

DATE 01.10.2023

Hun-uk thumna : Jangminthang
Lapi : Siamkhanmuan
Thilpiak : Thangzalam
Theihgigena : Nekkhothang
Thugen : Thongginlian
Thumna : Ginlian

MIDWEEK ONLINE BIBLE CLASS

DATE 4.10.2023

Thumna : Kamkhenhang
Sinsaktu : Chuck Horner
Thumna : Kammuanlal

KIGINNI

DATE 7.10.2023

Hun-uk thumna : Jangthang
Lapi : Pauminlun
Thugen : Reuben
Thumna : Jamson

TOUPA' NI

DATE 8.10.2023

Hun-uk thumna : Jangthang
Lapi : Pauminlun
Thilpiak : Thongginlian
Theihgigena : Thangdouliau
Thugen : Siamkhanmuan
Thumna : Lang James

YOUTH WORKSHOP OM DIING

❖ A hongtung diing october 28-29 sung tuailai lam deuhte a diing in **Youth Workshop** chih minvuah in program poimohak leh nuamtak neih hi diing. Hunzeek a tamzaw youth coordinator-ten a saifelsa uh hita. Hiai hun a sinsaktu diing in un-aute Kamlianpau leh Lang James muantak a guan ahi uhi. A thupi diing **KITEENNA** chih hi a, tuailai lamte a diing in kituak in hoih mahmah. Hiai ni a man teitei diing in tua kipan in tuailai lamte kisak khol diing in i kingen ahi.

HONGZIN DIING

❖ Hun sawt kum paita apan in unaupa Khupmang in a bil ana buaipih den a, tu chiang in a khozakna leng naktak in sukha hi. Ni dang in Lamka ah ana kiensak a, at ngai diing ana chih-sak uhi. Sum tam a bei chituak luat zaik in Imphal lam sawm nawn a himahleh gal buai in lap man hi. Tu dinmun et in a khozakna buai sim mahmah a, huaiziak in Delhi lam ah hong ki-ensak diing in unaupa Kamlianpau hong zin chiang in hong kitawn diing uhi. Delhi a Saptuamte'n naktak a i na buaipih uh kul diing hi.

A TICKET DIING LAKKHIT HITA

❖ Mission Veng a unauhte'n i ngetna uh ahon phalsak uh toh kiton in **Lectureship** leh **youth workshop** a thugentu diing a i chial luh unaupa Kamlianpau hong paina diing lenna ticket laksak khit hita hi. Dam a Pathian in lem ahon sakpih leh October 19 in Delhi hongtung diing a, October 30 chiang in kiknawn diing hi.

ANA KIKNAWNTA

❖ Poimohna tuamtuam ziaak a Delhi hongzin unaupa Levi in kal paita sung in a sepna Imphal lam zuan in honna paikisan nawnta hi.

NGAPLOU UH

❖ Kal nihvel paita apan in unaupa Richard Doukhankhual tate Vunghoih leh Ginsang, hitang khosik ziaak in ngaplou in ana om uhi. Tu chiang in ahiehleh hoihzaw deuhta uhi. Damna hoihzaw ahon neih theihman un kipahhuai isa uh hi.

NAU MIN PHUAK UH

❖ Kal paita Toupa ni nitaklam in unaunu Ngaimuankimte'n atanu min phuahna hun ana zang uhi. Hiai hun ah tanau bangza hiam kaikhawm in a min diing in **Nemnunmawi** ana phuak uhi. Preacher unaupa Jamson in hasotna leh thumsakna hun zang hi.

BIBLE THAK TAMTAK IN KILEI

❖ Paita pau a kisun thak bible Delhi a unauhte tamtak in Lamka apan kithukhak in kilei hi. Bu 40 lam kilei khia diing hi. Bible sim hahkat sem sawm i hihdan uh akilat theih man in kipahhuai isa uh. Unaupa Khamminthang leh Kammuanlalte phattuum ngaihna ziaak a zangkhaitak a i muh theihman un amaute leh Lamka lam a ana buaipih unauhte Kamlianpau, Mungmuanlian leh Kamsuanliante tung ah leng i kipak uhi.

SUNNA! SUNNA!

❖ Kal paita nilaini zinglam dak 6 vel in Lamka a om unaupa Khenchin in honna mualliamsanta hi. Unaupa ahiehleh taksalam ah leng upa mahmahta a kum 96 bang chingta hi. Biakna limsak mi, upat nung a leng biakna hun sung a moklusulou, thugen hoihtak a ngai mi, mi etton tak petmah mi ahi. I sun petmah uh.

❖ Huchi bang kawmkal ah kal paita Toupa ni in unaupa Khamthianmungte'n leng taksa a apu uh ana sun uhi. I thuakpih leh i sunpih thu i taklang uhi.